

TAL CÛR DE STORIE E DI UN POPUL

Ancje chest, an, o ricuardarín chel 3 di auríl dal 1077 che l'inperadôr Rico IV i à dade al patriarcje Sigjeart l'invistidure ducâl, fasint nassi la «Patrie dal Friûl». Lu fasin pal fat in sé, aromai menât vie dal flum de storie, e pal significât dal fat, ch'a là di valè ancje in dì di vuè, tune suage difarent. Parceche un popul nol è popul se nol à une sô libertât spirituâl, politiche, culturâl, economiche; se nol è paron de sô tiere e dal so avignî.

Lu fasin a Vençon, la sitadine miedevâl che jè il speli plui stralusint di chê Ete di mieç che à fat di telâr storic ai lusors de nestre Patrie. A Vençon ogni clap al è storie; ancje lis maseriis e àn un lôr lengaç e une lôr significazion.

Lu fasin tal decin dal taramot. La sielte di Vençon e à volût jessi ancje un at di ricognossince a di chest païs ch'al à savût e volût riscjâ di restâ disfigurât par sinpri pitost di tornâ sù cemût che lu volevin cheâtris, come sgnacât in muse a di une int che à dirit di cressi insieme cu lis sôs cjasis, cu lis sôs contradis, cul so mumssipi e cul so domo. Onôr, duncje, `e int di Vençon che à sielte la strade plui grivie e plui periculose e tun cert sens ancje odiose: chê de libertât e de dignitât. A rivaran dopo di cheâtris, ma a varan un païs patît e vuadagnât e ancje lôr lu gjoldaran di plui.

Chest an la nestre fieste nazionâl nus à costât ancje a nô cetant. O vin volût fâle instes par no cedi al ricat di cualchidun ch'al volares difindi lis minorancis cui stes sistemis des majorancis. Ma la prepotense, se e jè orende tun grant, tun piçul e fâs spessie e dûl.

S'ò crodin che la diviersitât e jè une ricjece e l'uniche strade par cressi, o vin di rispjetâ lis regulis dal zûc, tune forme di pluralîsin là che duc' a fàsin la lôr part e a dan il lôr contribût. Il Friûl e la sô storie a son nestris, di duc'.

Il cjatâsi a Vençon e jè partant une sielte di rispjet pe storie, di riguart pe int e di autentiche autonomie. E se la lezion nus servissarà a duc' par jessi plui rispjetôs de diviersitât e par svinidrî ogni lidrîs di prepotense e di monopoli, chest al sarà veramenti il nestri plui biel tre di avrîl. Pal rest, ognun ch'al rispuindi cu la sô cussiense.